



ҚҰҚЫҚТЫҚ ТӘРТІПТІ НЫҒАЙТУ МАҢЫЗДЫ

Президент Қасым-Жомарт Тоқаев Ішкі істер министрі Ержан Сәденовті қабылдады.

Қасым-Жомарт Тоқаевқа елдегі криминал-дендік жағдай және ішкі істер органдарының «Заң мен тәртіп» қағидатын іске асыру барысы жөнінде ақпарат берілді. Президентке елімізде қабылданған кешенді шаралар нәтижесінде былтыр қылмыс саны 12,7 мыңға азайғаны баяндалды.

Соңғы жылдары қылмыс деңгейінің, әсіресе кісі өлтіру, қарақшылық, тонау мен ұрлық сияқты аса ауыр қылмыс түрлері көрсеткіштерінің айтарлықтай төмендеуі байқалады. Сонымен қатар тергеудің заманауи әдістерін енгізу арқылы қылмыстың барлық санаты бойынша ашылуы жақсара түскен.

Ержан Сәденов қылмыскерлерді іздестіру жұмыстарының нәтижесі туралы айтты. 2024 жылы полиция іздеуде жүрген 1 949 адамды ұстаған.

Мемлекет басшысына ұйымдасқан, кибер және есірткі қылмыстарына қарсы іс-қимыл, сондай-ақ құқықбұзушылықтардың алдын алу жөніндегі тапсырмаларының орындалу бары-

сы таныстырылды. Соның ішінде ұйымдасқан қылмыстық топқа қатысқаны үшін 264 адам қылмыстық жауапкершілікке тартылған.

Министрдің айтуынша, соңғы 12 айда есірткі таратуға қатысты ақпарат жариялаған 7 500-ге жуық интернет-ресурс анықталды, 22 тоннаға жуық есірткі айналымға жіберілмеді, 64 есірткі зертханасы жойылды. Интернет-алаяқтардың 65 миллион қолына бұғатталды. Нөмірлерді ауыстыруға арналған 48 SIM-box құрылғысы әшкереленді. Алаяқтардың 2 миллиард теңгеден астам қаржыны елден шығаруына жол берілмеді.

Ведомство басшысы көмелет жасына толмағандардың құқықтарын қорғау, көші-қонды бақылауды күшейту, жол қауіпсіздігін қамтамасыз ету, қылмыстық-атқару жүйесін жетілдіру жөніндегі шаралар туралы хабарлар етті.

Кездесу соңында Қасым-Жомарт Тоқаев елдегі құқықтық тәртіп пен қоғамдық қауіпсіздік деңгейін одан әрі арттыру бойынша бірқатар тапсырма берді.



ОРТАЛЫҚ САЙЛАУ КОМИССИЯСЫ ТӨРАҒАСЫН ҚАБЫЛДАДЫ

Мемлекет басшысы Орталық сайлау комиссиясының төрағасы Нұрлан Әбдіровті қабылдады.

Президентке Бүкіләлемдік сайлау күні аясында елімізде өткізілген іс-шаралар, 2024 жылғы электоралды кампаниялардың қорытындылары, ОСК қызметінің қазіргі жай-күйі мен алдағы жоспары баяндалды.

Сонымен қатар Қасым-Жомарт Тоқаевқа сайлау комиссиясының халықаралық ынтымақтастықты кеңейту жөніндегі бастамалары таныстырылды.

МӘСЕЛЕ

ТІС АУЫРСА, ІШ АУЫРСА, МӘМС КӨМЕК БЕРМЕЙДІ...

Президент Үкіметтің кеңейтілген отырысында МӘМС жүйесін реформалауға серпін беруді жүктеді. Себебі сала былығып жатыр және түйткілі де сәт сайын көбейіп барады. Мысалы, қаражат игерушілер бес айлық, тісі жоқ сәбидің «тісін емдедік» деп қосып жазған. Бір адамның 82 тісін емдеген! Бұл енді жолды сүріп тастап, жылда қайта асфальт төсейтін «бизнеске» ұқсайды. Өз кезегінде стоматологтар қордың сырқаттар тісін анестезиясыз, шыңғыртып жұлуға мәжбүрлеп жатқанын айтып, дабыл қақты. МӘМС жүйесіндегі дау-жанжал неге көбейді?

→ 4

ЖАҢАРҒАН ЖОЛДАР – НАРЫҚТЫҢ КҮРЕТАМЫРЫ



«Жол азабын жүрген білер» демекші, оңтүстіктен солтүстікке, шығыстан батысқа созылып жатқан тарам-тарам жолдардың сапасы соңғы жылдары жиі сынға ұшырап жүрді. Мемлекет басшысы да жыл басында көлік-логистика саласына ерекше назар аударып, бұл бағытта одан әрі даму үшін айтарлықтай әлеует бар екенін айтқан еді. Жақында өткен отырыста Үкімет мүшелері Президенттің осы тапсырмасын пысықтап, еліміздің көлік инфрақұрылымын жаңа деңгейге көтеру мәселелері кеңінен талқылаған болатын. Қазір Қазақстанда 95 мың шақырымнан астам жол желісі болса, соның 25 мыңы – республикалық маңызы бар автотрассалар, ал қалғандары жергілікті жолдарға жатады. Бұл жолдардың «өткені» баршаға мәлім, бүгінгі мен болашағы қалай?

→ 4

ҚАУІПТІ БЕТІ ҚАЙТПАЙ ТҰР

Былтыр тұтас елді әбігерге салған топан су биыл да аса үлкен қатер төндіреді деген қауіп басым. Елдің жүздеген ауылы су тасқыны қауіпті аймақтар қатарына енгізілуі осыған айқын дәлел.



→ 7

ТЫҢДАРМАННЫҢ ЖЕТЕГІНДЕ КЕТПЕУІ КЕРЕК

Бүгінгі әнсүйер қауымның талғамы да, өнер ордасын толықтырған әншілер қатары да кеңейді. Алайда ұзақ жылдар бойы құлақтан кіріп, бойды алған әсем әнді орындаушылардың орны бөлек.



→ 8

АЛАЯҚ АЙЛАСЫН АСЫРМАСЫН

Фишинг, дроппер, сим-бокс, кибервирус, анти-фрод, онлайн-сауда, жалған несие, жалған инвестиция, үлескерлер, қаржы пирамидасы, криптовалюта, инвестиция, киберқалқан және тағы басқалар. Бұл алаяқтықпен күресте жиі кездесетін сөздер. Олардың мазмұнына қарап, қазір ең бір ұшығып тұрған бұл құбылыстың түрі мен сипаты күрделі екенін айқын көруге болады. Ал мұнда миллиардтап айналып жатқан сомалар оның ауқымын көрсететіндей. Ендеше елімізде алаяқтық ахуалы қандай? Онымен күрес қалай жүруде?



→ 5

6 АҚПАН 2025 | БЕЙСЕНБІ

АЗАМАТТЫҚ ҚОРҒАУ ТАЛАПТАРЫ КҮШЕЙТІЛМЕК

Мәжіліс Спикері Ерлан Қошановтың төрағалығымен жалпы отырыс өтті. Онда депутаттар азаматтық қорғау мәселелері бойынша заң жобасын бірінші оқылымда мақұлдап, Өзбекстанмен арадағы халықаралық келісімді де ратификациялады.

Мәжіліс депутаттары азаматтық қорғау мәселелері бойынша заң жобасын бірінші оқылымда мақұлдады. Оның аясында Мемлекет басшысының тапсырмасы бойынша өрт және өнеркәсіптік қауіпсіздік, азаматтық қорғаныс және сейсмикалық қауіпсіздік саласындағы жекелеген талаптар күшейтілген. Төтенше жағдайлар министрі Шыңғыс Әрінов заңнамалық өзгерістер туралы толығырақ түсіндіре келе:

— Төтенше жағдайлар министрлігіне биіктігі 28 метрден асатын ғимараттар мен адамдар жаппай жиналатын объектілерді пайдалануға беру кезінде өрт қауіпсіздігі талаптарына сәйкестігі туралы қорытынды беру өкілеттігі беріледі. Сондай-ақ жаңадан жобаланатын Хан Шатыр, ЭКСПО сияқты құрылысы ерекше объектілерге қатысты арнайы техникалық шарттарды келісу нормасы енгізіледі, — деді министр.

Технологияларды, құрал-жабдықтарды және жұмыс әдістерімен бірге, қайта жабдықтау процесін тиімді ұйымдастыру үшін министрлікке қауіпті өндірістік объектілерді жаңарту мен техникалық қайта жабдықтаудың жиынтық жоспарын келісу құзыреті беріледі.

Сейсмикалық аймақтарда орналасқан халықтың қауіпсіздігін қамтамасыз ету үшін жаңа жүйелік тәсілдер енгізіледі. Төтенше жағдайлар министрлігі мен жергілікті атқарушы органдарға сейсмикалық қауіптілікке бағалау жүргізу өкілеттігі беріледі. Мұнда халықты жер сілкінісінен қорғау және олардың салдарын жою жөніндегі іс-шаралар көзделді.

Азаматтық қорғаныс бойынша жекелеген нормалар қарастырылған. Қазір азаматтық қорғаныстың қорғаныш құрылыстарының бір бөлігі жекелеген



шікте. Оларды есепке алу тәртібін белгілеу үшін құқықтық кадастрда жеке жылжымайтын мүлік объектісі ретінде құрылыстарды тіркеу енгізіледі.

Жаһандық және өңірлік төтенше жағдайлар кезінде тұрақты жұмыс істейтін Республикалық жедел штаб құрылады. Оның негізгі функциялары — төтенше жағдайлар мен олардың салдарын жою жөніндегі шараларды әзірлеу, орталық және жергілікті атқарушы органдардың қызметін үйлестіру, сондай-ақ іс-шаралардың орындалуын бақылау.

Шыңғыс Әрінов заң жобасының негізгі бағыттарының бірі азаматтық қорғау органдары қызметкерлерінің әлеуметтік жағдайын жақсарту екенін

атап өтті. Оларға тұрғын үй өтемақысы және қызметі бойынша басқа өңірге көшкені үшін қосымша төлем төленеді. Төтенше жағдай, соғыс жағдайы немесе төтенше жағдай жарияланған аймақтарда жұмыс істегені үшін үстемеақы белгіленеді. Үстемеақы ақшалай қаражаттың 3 еселенген мөлшерінде төленеді, ал еңбек өтілінің бір күні үш күнге есептеледі. Ерікті өрт сөндіру бөлімшелері үшін де материалдық ынталандыру шаралары қарастырылған.

Түзетулерді талқылау Экология мәселелері және табиғатты пайдалану комитетінің мүшесі Аян Зейнуллин жетекшілік ететін жұмыс тобының отырыстарында жалғасады.

Сонымен қатар мәжілісмендер Қазақстан мен Өзбекстан үкіметтері арасындағы «Орталық Азия» халықаралық өнеркәсіптік кооперация орталығының қызметін реттеу туралы келісімді ратификациялады. Түзетулерді Сауда және интеграция министрі Арман Шақкалиев таныстырды.

— Орталық «Атамекен» (Қазақстан) және «Гүлістан» (Өзбекстан) бақылау-өткізу бекеттерінің жанында орналасады және оның құрамына өндіріс орындары, қоймалар, көлік инфрақұрылымы кіреді. Бұл жүк тасымалдауды жеделдетуге, логистикалық шығындарды азайтуға, жеткізу тізбегіне қатысушылардың санын азайтуға, тұтынушылар үшін өнімнің түпкілікті құнын төмендетуге, жеткізу жылдамдығын арттыруға және «Солтүстік-Оңтүстік» дәлізі аясындағы өндірістік ынтymақтастықты дамытуға мүмкіндік береді, — деді министр.

Орталықтың жалпы аумағы 100 гектарды құрайды, оның жартысы — Қазақстанға, екінші бөлігі Өзбекстанға тиесілі. Белгіленген аумаққа өңірлік индустриялық аймақ мәртебесі беріледі. Орталықтың инфрақұрылымы бюджеттен тыс қаражат есебінен салынады. Түркістан облысы әкімдігі негізгі инвесторды анықтады. Орталықтың ресми ашылуы 2027 жылдың бірінші жартыжылдығына жоспарланған.

Орталық жаңа өндірістер мен жұмыс орындарын құруға, ауыл шаруашылығы және өнеркәсіп өнімдерін өңдеуге, машина жасау, металл өңдеу, фармацевтика, электротехника, химия, былғары, тоқыма және тігін өнеркәсібін дамытуға қолдау көрсететін болады.

Сонымен қатар жалпы отырыста Мәжіліс комитеттері бірқатар жаңа заң жобасын, атап айтқанда, топырақты қорғау туралы және жасанды интеллект туралы заң жобалары мен оларға ілесіп түзетулер, жер қойнауы және жер қойнауын пайдалану туралы кодекске енгізілетін түзетулер және Қазақстан мен Өзбекстан үкіметтері арасындағы Қазақстан-Өзбекстан мемлекеттік шекарасының режимі туралы келісімді ратификациялау жобасын жұмысқа қабылдады.

Мейір ЖАСЫН

ЖЕМІСТІ ҰНТЫМАҚТАСТЫҚ ЖАЛҒАСЫН ТАБАДЫ



Премьер-Министр Олжас Бектенов Қазақстанға ресми сапармен келген Грузия Премьер-министрі Ираклий Кобахидземен кездесті. Сауда-экономикалық байланыстарды дамыту, көлік-логистика, мұнай және мұнай өнімдерін тасымалдау, цифрлық технологиялар, ауыл шаруашылығы, туризм және басқа да салалардағы өзара іс-қимылды кеңейтуге баса назар аударып отырып, екіжақты ынтымақтастық мәселелері талқыланды.

Олжас Бектенов Мемлекет басшысы Қасым-Жомарт Тоқаев Грузиямен екіжақты ынтымақтастықты нығайтуға ерекше мән беретінін атап өтті. Түрлі деңгейдегі белсенді диалог екіжақты тауар айналымын одан әрі әртарап-тандыруға және кеңейтуге ықпал етеді. Бүгінде Қазақстан-Грузия қарым-қатынасы барлық бағыт бойынша қарқынды дамып келеді.

Бірлескен Үкіметаралық комиссия аясында тауар айналымын арттыру жұмыстары жүргізілуде. 2023-2026 жылдарға арналған өзара тауар айналымы ауқымын кеңейту жөніндегі Жол картасы іске асырылуда. Қазақстаннан экспортталатын өнім номенклатурасы шикізаттық емес тауарлардың жаңа түрлерімен толықтырылуда. Грузия нарығына құны 66 млн-нан астам отандық тауардың 35 түрін жылжыту бойынша шаралар қабылданды. Тізімге мұнай-химия, металлургия, тамақ өнеркәсібі, химия, машина жасау салаларының өнімдері кіреді.

Келіссөздер барысында Транскаспий халықаралық көлік бағытының әлеуетін ашу арқылы транзиттік-көліктік өзара іс-қимылды арттыруға назар аударылды. Қабылданған шаралар орта дәліздің өткізу қабілетін 2027 жылға қарай жылына

10 млн тоннаға дейін арттыруға мүмкіндік береді деп күтілуде. Сонымен қатар бәсекеге қабілетті тарифтік шарттарды белгілеу, жеткізу мерзімдерін қысқарту және бағыт бойынша жүк тасымалдау көлемін ұлғайту бойынша жұмыстарды жалғастырудың маңыздылығы атап өтілді. Бұл ретте қазақстандық компаниялар Грузияда қуаттылықты арттыруға да қатысады. Биыл Грузияның Поти портында қазақстандық көлік-логистика инвестициялық топ салып жатқан жаңа мультимодальды терминалды іске қосу жоспарлануда.

«Өткен жылы ТХКБ арқылы тасымалдау көлемі 62%-ға өсіп, 4,5 млн тоннаны құрады. Бағыттың әлеуетін арттыру, сондай-ақ инфрақұрылымды, порт және терминалды қуатты жақсарту, жылжымалы құрамды ұлғайту, әкімшілік кедергілерді жою және тасымалдаушылар үшін қолайлы жағдай жасау жұмыстары жүргізіліп жатыр. Қазақстан Үкіметі барлық бағыт бойынша Қазақстан-Грузия әріптестігінің серпінді дамуын қамтамасыз ету үшін жан-жақты жұмысты жалғастыруға ниетті», — деп атап өтті Олжас Бектенов.

Өз кезегінде Ираклий Кобахидзе Грузияның Қазақстанмен екіжақты байланыстарды дамытуға және нығайтуға мүдделі екенін айтты.

Мемлекет басшысының әлеуметтік маңызы бар жобаларды іске асыру жөніндегі тапсырмасын орындау аясында Үкімет Ұлытау облысының Қаражал қаласында 80 орындық мектеп салуға Арнаулы мемлекеттік қордан 1,4 млрд теңгеден астам қаражат бөлді.

ҰЛЫТАУДА ЖАҢА МЕКТЕП САЛЫНАДЫ

Білім беру нысаны «Вокзал» шағынауданында салынады. Бүгінде шағынауданда тұратын балалардың басым бөлігі қаланың басқа аудандарындағы мектептерде білім алады. Оларды екі ауысымда апарып, әкелу үшін автобус ұйымдастырылған. Жаңа білім ошағының құрылысы балаларды заман талабына сай оқытуға қолайлы жағдай жасап, білім алуға қол жеткізуді арттыруға мүмкіндік береді.

Бүгінде Үкімет Арнаулы мемлекеттік қордан әлеуметтік маңызы бар нысандарды салуға шамамен 56,6 млрд теңге бөлді. Олардың қатарында Атырау облысының Жамансор, Жетісу облысының Рудничный және Көксаи ауылындағы мектептер, Түркістан облысының Темірлан ауылындағы музыкалық мектеп, Ақмола облысының Зеренді ауылындағы спорт кешені, Риддердегі көпсалалы аурухана кешені, Шымкенттегі жатақхана және Ақтөбе мен Петропавлдағы 2 балабақша бар.

Арнаулы мемлекеттік қорға ақша қаражатын аударудан басқа, «Заңсыз иемденілген активтерді



мемлекетке қайтару туралы» заң субъектілерінің қаражаты есебінен Арқалық қаласында дарынды спортшы балаларға арналған спорт кешені, Астанада тірек-қимыл аппараты бұзылған балаларға арналған оңалту орталығы, Алматыда ерекше қажеттіліктері бар адамдарға арналған жаттығу орталығының құрылысы жүргізілуде.

БІРЫҢҒАЙ ТҮБІРТЕК ЖҮЙЕСІ ЕНГІЗІЛЕДІ



Өнеркәсіп және құрылыс министрлігі өз бақылауындағы аумақтарды цифрландыру бойынша белсенді жұмыс істеп жатыр. Былтырғы қараша айынан бастап барлық коммуналдық қызметке Бірыңғай түбіртек енгізу бойынша белсенді жұмыс жүргізіліп жатыр.

Бұл туралы Өнеркәсіп және құрылыс вице-министрі Жәннат Дүбірова әлеуметтік желідегі парақшасында жазды. Түбіртек барлық төлемді шоғырландыруға арналған. Төлеушілерге ыңғайлы болу үшін барлық ақпарат бір түбіртекте жинақталды.

— Біздің мақсатымыз — бұл жүйені қалаларда ғана емес, аудан орталықтары мен ауылдарда да қолжетімді ету. Бір түбіртек екінші деңгейлі банктер арқылы онлайн режимде беріледі және оны оңай төлеуге болады. Сұраныс бойынша қағаз нұсқасы да қолжетімді. Облыс әкімдіктері жұмысқа кірісіп кетті, бірқатар елді мекенде тұрғындар цифрлық түбіртек ала алады. Біз азаматтарымыз үшін үдерістерді кеңейтуді және жеңілдетуді жалғастырамыз, — деп атап өтті Жәннат Дүбірова.

БАҒДАР

6 АҚПАН 2025 | БЕЙСЕНБИ

МИЛЛИОННАН АСТАМ АЗАМАТТЫҢ
ЗЕЙНЕТАҚЫ ЖИНАҒЫ ЖОҚ

Мәжілістің жалпы отырысында депутат, «AMANAT» партиясы фракциясының жетекшісі Елнұр Бейсенбаев еліміздегі өзекті әлеуметтік мәселенің бірі – жұмыссыздықты көтеріп, Үкіметке депутаттық сауал жолдады. Ол Мемлекет басшысының халықтың жұмыспен қамтылуы және табысын сақтауды басты басымдық ретінде бірнеше рет атап өткеніне назар аударды.

— Алайда осы басымдықты іске асыруға жауапты министрліктердің қазіргі әрекеттері үлкен сұрақтар тудырады. Себебі соңғы 15 жыл ішінде жұмыссыздықтың нақты деңгейі әдейі төмендетіліп, 4–5% деңгейінде сақталып отыр деген түсінік қалыптасты. Үкімет бұл көрсеткішті қалыпты жағдай ретінде қабылдай бастады. Нәтижесінде, еңбек нарығындағы нақты көрініс бұрмаланып, халықты жұмыспен қамту бағдарламаларының тиімсіздігіне әкеліп отыр, — деді депутат.



Оның айтуынша, Үкімет бұл мәселені кешенді түрде шешудің орнына, күш-жігерін уақытша жұмыс орындарын құруға бағыттауда.

Дамыған Еуропа елдерінде, атап айтқанда, Финляндия, Франция, Италия

және Испанияда жұмыссыздық деңгейі орта есеппен 7%-дан 12%-ға дейін жетеді. Бұл ресми деректер мен еліміздегі еңбек нарығындағы шынайы жағдай арасындағы алшақтықты айқын көрсетеді. Аталған елдерде жұмыссыздық статистикасы

объективті өлшемдерге негізделсе, бізде бұл көрсеткіш мүлдем басқаша есептеледі.

— Менің ойымша, бұл сандар арасындағы айырмашылық еліміздегі ресми статистиканы есептеу әдістемесінен тұрады. Жұмыспен қамтылғандар қатарына маусымдық жұмысшылар, қоғамдық жұмыстарға уақытша тартылғандар, сондай-ақ тұрақты табысы жоқ екі миллионға жуық өзін-өзі жұмыспен қамтыған азаматтар енгізіледі, — деді Елнұр Бейсенбаев.

Депутаттың айтуынша, тәуелсіз сарапшылардың есебі бойынша, еліміздегі нақты жұмыссыздық деңгейі әлдеқайда жоғары — кемінде 12%, бұл шамамен бір миллион адамға тең.

Сондай-ақ ол жоғары оқу орындары мен колледж түлектерінің 40%-ы алғашқы жылы жұмыс таба алмайтынын, ал 60%-ы өз мамандығы бойынша еңбек етпейтінін атап өтті.

Еңбекақының едәуір бөлігі «көлекке» қалып отыр, бұл зейнетақы аударымдары мен медициналық қамтамасыз ету жүйесіне кері әсер етеді. Бүгінде 1 миллионнан астам азаматтың зейнетақы жинағы жоқ, ал 3,5 миллион адам міндетті әлеуметтік медициналық сақтандыру (МӘМС) жүйесіне жарна аудармайды.

— Неліктен әлі күнге дейін 3 миллионнан астам қазақстандық әлеуметтік қорғау жүйесінен тыс қалып отыр? Олар мемлекеттік органдардың есебінде жоқ, тұрақты табысы болмай, кездейсоқ табыс көздеріне сүйеніп өмір сүреді. Бұл елдегі экономикалық белсенді халықтың төрттен бірін құрайды, — деді депутат.

Оның пікірінше, еңбек нарығындағы осындай бұрмаланған жағдай халықты жұмыспен қамту бағдарламаларының тиімсіздігіне әкеледі.

Осыған байланысты бірқатар ұсынысын айтты. Олар: ұзақмерзімді және тұрақты жұмыспен қамтуға жағдай жасап, лайықты табыс деңгейін қамтамасыз ететін кешенді стратегия әзірлеу; халықтың жұмыспен қамтылу жағдайын шынайы көрсететін нақты деректерді жинау мен талдаудың тиімді әдістерін әзірлеу; МӘМС жүйесінен тыс қалған 3,5 миллион адамды, зейнетақы жарнасы жоқ 1 миллион азаматты, 2 миллион өзін-өзі жұмыспен қамтыған адамды және шамамен 400 мың НЕЕТ санатындағы жастарды заңды еңбек нарығына шығару үшін жүйелі шаралар қарастыру.

Мейір ЖАСЫН

АЗАМАТТАРДЫ ӘЛЕУМЕТТІК ҚОЛДАУ
ЖОЛДАРЫ ТАЛҚЫЛАНДЫ

«AMANAT» партиясы Шымкент қалалық филиалы жанындағы «Отбасы мәселелері және халықты әлеуметтік қорғау» жөніндегі аймақтық кеңесінің отырысы өтті. Жиынға партия филиалының атқарушы хатшысы Мұрат Жолдыхожаев, кеңес төрайымы Баян Жандосова, кеңес мүшелері, бірқатар басқарма басшылары, партия филиалының қызметкерлері қатысты.

Мәжілістің күн тәртібінде қалалық деңгейде халықты әлеуметтік қолдау және кедергісіз орта қалыптастыру бойынша атқарылған жұмыстардың жай-күйі қарастырылды. Сонымен қатар аз қамтылған және толық емес отбасыларға

қатысты жүргізіліп жатқан жұмыс мәселелері талқыланып, алдағы міндеттер белгіленді. Отырыста партияның сайлауалды бағдарламасының аясындағы бірқатар тармақтардың іске асырылу жолдары талқыланды.

Шымкент қаласы Жұмыспен қамту және әлеуметтік қорғау басқармасының басшысы Жанат Утебаева және Тұрғын-үй басқармасының басшысы Азат Исламов өз баяндамаларында атқарылған жұмыстарын таныстырды. Олар әлеуметтік қолдау жүйесі мен тұрғын үй мәселелері бойынша өнірге атқарылған шараларды кенінен түсіндіріп, алдағы уақытта қолға алынуға тиіс бағыттарды атап өтті.

Сонымен қатар «Отбасы мәселелері және халықты әлеуметтік қорғау» жөніндегі аймақтық кеңестің құрамында өзгертулер мен толықтырулар енгізілді. Бұл өзгерістер кеңестің жұмысын тиімді жүргізуге және халықтың әлеуметтік қажеттіліктерін жақсырақ қанағаттандыруға бағытталмақ.

Баян Жандосова өз сөзінде еліміздің басты құндылығы — адам екенін атап өтіп, еліміздің экономикалық өсіміннің игілігін әрбір азамат көруі керектігін жеткізді. Ол «AMANAT» партиясы жұмысының негізгі басымдылығы халықтың әл-ауқатын арттыруға бағытталғанын, сондықтан Жол картасында белгіленген міндеттерді орындауға бақылау жасап, бірлесе жұмыс жасауға шақырды.

«Жастар Рухы» жастар қанатының Алматы қалалық филиалы мен Принтмедиа технологиялар колледжі арасында меморандумға қол қойылды. Оқу орындары арасындағы меморандум жастардың шығармашылық әлеуетін арттыруға, сондай-ақ студенттердің өз саласында білімі мен тәжірибесін жетілдіруге бағытталған. Колледж мамандарының сөзінше, «Жастар Рухы» жастар қанатымен арадағы келісім студенттердің тың бастамаларын жүзеге асыруға мүмкіндік береді.

МЕМОРАНДУМҒА
ҚОЛ ҚОЙЫЛДЫ

Сурет ЖИ көмегімен жасалған

ЖОЛ КАРТАСЫНЫҢ ОРЫНДАЛУ
БАРЫСЫ ҚАРАЛДЫ

Ақмола облысы әкімінің орынбасары Ернар Жаркешовтің төрағалығымен «AMANAT» партиясының сайлауалды бағдарламасын жүзеге асыруға бағытталған Жол картасының орындалу барысы талқыланды.

Елімізде «AMANAT» партиясының 2023–2027 жылдарға жоспарланған сайлауалды бағдарламасын іске асыру мақсатында арнайы Жол картасы әзірленген болатын. Былтыр өнірге осы бағытта бірқатар жұмыстар атқарылды. Алайда облыс бойынша Жол картада белгіленген 130 іс-шараның 84%-ы орындалса, 14%-ы орындалмаған.

Өткен жылдың жоспарына еніп, алайда орындалмай қалған 19 тармақ бойынша облыс әкімінің орынбасары жауапты мемлекеттік органдарды тыңдады. Орындалмаған әлеуметтік маңызды бар тармақтар бойынша Ақмола облысының бюджеттік жоспарлау және экономика басқармасының жетекшісі Алмагүл Шұғырмақова түсініктеме



беріп, аталған тармақтардың биылғы жылға ауыстындығын, орындалмаған міндеттер бойынша нақты шаралар белгіленетінін жеткізді.

Ақмола облысы әкімінің орынбасары Ернар Жаркешов бюджетті тиімді жоспарлау мен сайлауалды бағдарламаны орындау күн тәртібіндегі негізгі

басымдық болу керектігін атап өтіп, Жол картасының орындалмау қаупі бар тармақтарына депутаттар тарапынан үнемі мониторинг жүргізіліп, оның орындалуын жан-жақты бақылауды қамтамасыз ету қажеттігін тапсырды.

Ә.САМАТҰЛЫ

Алтынай БАУЫРЖАНҚЫЗЫ,
Алматы қаласы

Былтыр Мемлекет басшысы Қасым-Жомарт Тоқаев Қазақстан халқына Жолдауында 2025 жылды «Жұмысшы мамандықтары жылы» деп жариялаған еді. «Жастар Рухы» ЖК өкілдерінің Принтмедиа технологиялар колледжіне ат басын бұруына негізгі себеп те сол — жұмысшы мамандарға қолдау көрсету. Одан өзге Ұлттық баспасөз күні аясында баспа саласында елеулі қызмет атқарып жүрген мамандардың еселі еңбегі ескеріліп, арнайы марапаттар табысталды. Жиынға арнайы қатысқан «Жастар Рухы» ЖК Алматы қалалық филиалының төрағасы Диларбек Ділдебек «Жұмысшы мамандықтары жылы» аясында жоғары оқу орындары мен колледждермен ынтымақтастықты одан әрі нығайту басты назарда екенін атап өтті.

— Биылғы жыл жұмысшы мамандарға арналды. Біздің Принтмедиа технологиялар колледжіне келудегі мақсатымыз да осы. Оқу ордасында білім алатын студенттер, сондай-ақ осында жұмыс істейтін баспа маманының барлығы жұмысшы мамандар қатарына кіреді. Сондықтан біз партия басшылығы атынан жұмысшы мамандарды Ұлттық баспасөз күні мерекесімен құттықтап, марапаттарымызды табыстау үшін келдік. Екінші маңызды жайт — колледжде «Жастар Рухы» ЖК-ның ұйымын ашу. Біз жоба аясында жұмысшы мамандарды даярлайтын колледждер мен жоғары оқу орындарын біріктіргіміз келеді. Сондай-ақ бүгін

меморандумнан бөлек колледж қабырғасында Ғылым декадасы өтеді. Мұнда біз Ғылым декадасы мен жұмысшы мамандар аясында іске асатын көптеген маңызды ғылыми жанылыппен, студенттердің бастамаларымен танысамыз. Келешекте оқу орнының басшылығымен тығыз ынтымақтастық орнататын деген сенімдеміз, — деді Диларбек Жұмағалиұлы.

Қазіргі уақытта «Жастар Рухы» ЖК-ның Алматы қаласындағы оқу орындарын қамтитын 20-дан астам ұяшығы бар. Диларбек Жұмағалиұлының айтуынша, ұяшықтар қаланың сегіз ауданында орналасқан. Ол жоспар бойынша биыл Алматы қаласындағы бірнеше жоғары оқу орындары мен колледждерді қамтып, ұяшықтар санын екі еселендіруді жоспарлап отырғанын жеткізді.

— Ақпан айында Түркісіб ауданында орналасқан екі бірдей колледжде ұяшық орналастыру жоспарда бар. Себебі бұл — «Жастар Рухы» ЖК маңындағы белсенді емес аудандардың бірі. Оның үстіне, Алатау, Түркісіб ауданында ЖОО кездеспейді. Аудан жастарымен жұмысты жетілдіре береміз. Біздің басты мақсатымыз — жұмыссыз жүрген шет аудандарды қамту, оқу орындарымен ынтымақтастықты дамыту, — деді Д.Ділдебек.

Бүгінге дейін «Жастар Рухы» ЖК шаһардағы 20-ға жуық оқу орнымен іскерлік келісім орнатқан. Келешекте партия өкілдері жастармен белсенді жұмыс жүргізу мақсатында бірлесе қызмет атқаратын оқу орындарының санын одан әрі ұлғайтуды көздейді.

